

- Երեւի, նրանք կը շարունակեն դեռեւս նստել, – հարցրի ես:
- Նրանք ամբողջ գիշեր կը լուսացնեն, – պատասխանեց Ասլանը:

ԺԹ. ՆՈՒՐ

Յետեւեալ օրը, առաւօտեան, ամեն ինչ պատրաստ էր: Մնում էր միայն փաշայի խոստացած թղթերը ստանալ եւ ճանապարհ ընկնել: Ասլանը կապ-կապում էր իր չեմոդանը:

– Միթե՞ այդքան կարեւորութիւն ունեն այդ թղթերը, որ արժէր նրանց սպասել, – հարցրի ես:

– Մի առանձին կարեւորութիւն չունեն, – պատասխանեց նա, – փաշայի երկչոտ զափթիւմները չեն կարող մեզ աւազակներից ազատել, բայց մի ուրիշ կողմից մենք պետք ունենք այդ թղթերի մէջ...

Ես հասկացայ Ասլանի միտքը. ես գիշերը առաջնորդարանում արդեն ականատես էի եղած, թէ ինչ ազդեցութիւն ունեցան Արզրումի փաշայի թղթերը ամեն կասկածները փարատելու համար:

Կեսօրին մօտ էր, երբ յայտնուեցաւ փաշայի քարտուղարը: Դա միեւնոյն երիտասարդն էր, որ մեզ առաջնորդում էր քաղաքի հնութիւնները հետազօտելու: Նա բերել էր իր հետ ոչ միայն փաշայի խոստացած թղթերը, այլեւ մի թանկագին նոէր նրանից: Դա մի գեղեցիկ արաբական նժոյգ էր իր բոլոր փառաւոր ասպազէնքով. գլուխը եւ պարանոցը զարդարած էր մետաքսեայ սել փունջերով, որ բռնած էին արծաթեայ, զանգակածել կոճակների մէջ. թամբի ծածկոցը պատրաստած էր վագրի մորթից, որի եզերքը զարդարած էր ոսկեթել ծոպերով. երկու սեւամորթ ստրուկներ, կարմիր մահուդի զգեստներով եւ գոյնզգոյն չալմաներով, աջ եւ ձախ կողմից բռնել էին աշխոյժ նժոյգի սանձը, որը, կարծես, ինքն էլ էր զգում իր գերազանցութիւնը եւ, բակը մտնելուն պէս, սկսեց խրիսնջալ եւ մի առանձին հպարտութեամբ առջեւի սմբակները դոփել գետնին:

Ասլանը, հասկանալով բանի էութիւնը, սանդուղքներից ցած իջաւ, դիմաւորեց թէ քարտուղարին եւ թէ նորին վսեմութեան ուղարկած նժոյգին: Զարտուղարը, սեղմելով Ասլանի ձեռքը, ասաց ճառական եղանակով.

– Ես ինձ շատ բախտաւոր եմ համարում, պարոն բժշկապետ, որ ինձ վիճակոցաւ թարգման լինել իմ տիրոջ՝ նորին վսեմութեան փաշայի՝ առ ձեզ ունեցած յարգանքի եւ սիրալիր զգացմունքների: Իմ տերը, բարեմաղթելով ձեզ բարի ճանապարհ եւ անդորրութիւն, իրան շատ երջանիկ կհամարէ,